

TE HEHEURAA API

I neia i te piha neneiraa a Henere, i Roto Miti i Utah, no te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoe.

Nu. 3

Mati, 1915

Mat. 9

“Ia a'o atu ra matou, eiaha'tu ia, o te tahi melahi no te ra'i mai, ia a'o atu ia outou i te evanelia maori ra i tei a'ohia'tu e matou ia outou na, ia riro ia oia ei anatema. Mai ta matou a hoi i parau a'ene, e teie a hoi au a parau faahou, Ia a'o atu te ho'e i te evanelia ia outou, maori ra i tei fariihia e outou nei, ia riro ia oia ei anatema.”

Galatia 1:8, 9.

‘ TE BIBILIA E TE MAU PARAU I HEHEUHIA MAI I TE TAU HOPEA NEI.’

“Ia a'o atu ra matou, eiaha'tu ia, o te tahi melahi no te ra'i mai, ia a'o atu ia outou i te evanelia maori ra i tei a'ohia'tu e matou ia outou na, ia riro ia oia ei anatema. Mai ta matou a hoi i parau a'ene, e teie a hoi au a parau faahou, Ia a'o atu te ho'e i te evanelia ia outou, maori ra i tei fariihia e outou nei, ia riro ia oia ei anatema.”

Galatia 1:8, 9.

I tai'o-pinepine-hia ra i teie nei parau a Paulo Apose-
tolo, e te feia tei patoi mai i te mau orometua e to te Ekale-

sia a Iesu Mesia i te Feia Mo'a i te Mau Mahana Hopea Nei, mai te tamata i te faahapa'tu i te Buka a Moromona e i te mau heheuraa a te Atua i heuhia mai i te mau mahana hopea nei e i papaihia hoi i roto i te Buka Fafan. No reira e hi'opoa rii tatou i te parau ta te mau Apostelo i haapii atu, mai te au i tei papaihia i roto i te Bibilia, e i reira e ite ai tatou e, aita o te "Momoni" i faahapa'tu, e aita hoi ratou i patoi noa'tu i te mau haapiiraa a te mau Aposetolo i tahito e ra, e faatura'tu ra ratou i taua mau Aposetolo ra, e ta ratou mau haapiiraa i haapiihia mai e ratou ra, e e parau maira te "Momoni" e mau parau mau ia a te Atua. E parau atoa hoi ratou e e mau parau mau a te Atua tei papaihia i roto i te Buka a Moromona e i roto atoa i te Buka Fafan, e ua na reira ratou i te parau atu i te mau taata'toa ra.

E na mua tatou i te hi'o i te huru o te evanelia te Paulo ma i haapii atu, ma te haamana'o i te tau irava i papaihia i nia nei ei upoo parau e ma te feruri i nia te auraa a te parau "MATOU." Na te parau e "Ia a'o atu ia outou i te evanelia maori ra i tei a'ohia'tu e matou ia outou na;" na taua parau ra i faaite mai e, na Paulo e vetahi e ra mau taata atoa hoi i a'o atu i te ho'e ana'e a ia evanelia.

E hi'o tatou i te pene ho'e ahuru aore no te Ohipa a te mau Aposetolo e e tai'o tatou i te parau no Korenelia e te mauruuru o te Atua e faatono mai i te ho'e melahi ia'na ma te parau, "Ua hi'o papu maite atura oia ia'na, ma'ta'u a'era oia, e ua na o a'era E te Fatu, eaha teie? Ua parau maira oia ia'na, o ta oe pure, e ta oe horoaraa tao'a, ua tae roa i nia i mua i te aro o te Atua ra ei haamana'oraa ia oe. E teie nei e tono oe i te taata i Iopa e tee ia Simona, o te parauhia ia Petero ra; e tia oia i o Simona rapaau iri ra i te taotoraa, tei tahatai to'na utuafare, na'na e faaite mai ia oe i ta oe haapaoraa." E tai'o atoa tatou i te parau ta

Petero i parau atu ia Korenelio, oia hoi i te evanelia ta'na i haapii atu, e mai te irava e toru ahuru a mamaha i faaite mai oia e, Aore te Atua e haapao i te huru o te taata, e o te evanelia ia no te mau taata atoa ia, o tei mata'u ia'na e o tei rave i te parautia. Ua a'o atura oia, o Iesu te Mesia, e ua parau no to'na poheraa e no to'na tia-faahou-raa mai te pohe mai e ua haamana'o oia i te mau peropheta i te mutaa ihora, ma te parau e, "Oia hoi ta te mau peropheta atoa i parau maira e, o te faaroo ia'na ra, e matara ia ta ratou hara i to'na ra i'oa. E te parau atura Petero i taua mau parau nei, ua mairi maira te Varua Maitai i nia iho i taua feia atoa i faaroo mai i taua parau. E te feia atoa o te peritome i faaroo ra, o tei haere atoa mai ratou o Petero ra, maere atura ratou, i te mea i ninihia mai te Varua Maitai horoahia-ra i nia atoa i te Etene. I faaroo atura hoi ratou ia ratou i te parauraa i te parau eê, e te haamaitairaa i te Atua: ua parau atura Petero ia ratou, E tia anei i te taata ia faaore i te pape ia ore ia baptizohia teie nei feia, o tei noaa hoi ia ratou te Varua Maitai mai ia tatou atoa nei? Ua parau atura Petero ia ratou e, baptizo ma te i'oa o te Fatu ra."

E i te mahana Penetetore ra, eaha te Petero pahonuraa i tuuhia mai ai te uairaa ra, "E te mau taeae nei, eaha matou nei?" Tera ia ta Petero pahonuraa, "E tatarahapa, e ia baptizohia outou atoa i roto i te i'oa o Iesu Mesia ia matara te hara, e horoahia mai ia te Varua maitai ia outou." —Ohipa 2:37, 38.

E hi'o atoa tatou i te parau ta te Atua i parau atu ia Paulo a na o ai oia ra, "E te Fatu, eaha vau, eaha te oe hinaaro?" Ua parau maira te Fatu ia'na, "A tia i nia, e haere oe i roto i te oire, ei reira oe e faaitehia mai ai i ta oe e rave." Ua haapao maite o Paulo i ta te Atua i faaue mai e ua haere tia'tu oia i te oire, ei reira ua farerei ai i te hoê pipi o Annania e na'na i haapii mai ia Paulo i te

evanalia. I muri iho ua baptizohia Paulo e ua farii i te Varua Maitai; (Ohipa 9:17, 18), na mua râ oia i te faaroo e te tatarahapa.

(E tuatihia teie parau.)

OLIVE TAUDERE.

E riro paha e uihia mai, e teteahi pae taata e, O vai ra oia. Na te Hehuraa Apî e haamaramarama'tu i taua mau taata ra, e e faaite atu i ta'na haerea i mua i te Atua e i to'na tiaraa a pohe ai oia.

O oia te hoê o na ite tootoru o tei ite, na roto i te mana o te Atua, i te mau apî auro no reira mai te Buka a Moromona. Ua tae mai o Ioane Baptizo e ua tuu i to'na na rima i nia iho i te upoo no Iosepha raua Olive e i faatoroa ia raua i te Autahu'araa a Aarona. E na farii raua i te Autahu'araa a Melehizedeka i raro a'e i te pue rima no Petero, Iakoba, e o Ioane. O Iosepha te taata matamua e o Olive te te piti i baptizohia i roto i te Ekalesia i teie nei tau hopea nei. O oia te hoê o na taata tooono i te faatiaraa i te Ekalesia i te 6 no Eperela i te matahiti 1830. E o Olive Taudere te orometua tei a'o i te a'oraa matamua i roto i te Ekalesia i teie nei tau hopea nei. E tauturu maitai roa oia i te iritiraa no te Buka a Moromona; ua papai rima noa oia i te pae rahi o taua buka ra i te re'o Baretane a iriti ai o Iosepha Samita te reira no roto mai i te re'o Aiphiti. Ua rave itoito oia i te ohipa a te Fatu e tae noa'tu i te matahiti 1838 e i taua matahiti ra ua hirihia oia i rapae i te Ekalesia.

Ua parahi oia i rapae au i te Ekalesia e tae noa'tu i te avae Novema i te matahiti 1848, ei reira ua baptizofaahou-hia ona e te Aposetolo Oretoni Haede. I te oire i Kanesville i Aiowa i ravehia taua oroa ra. I muri iho rii ua haere oia i Ritimoni i Mitori; e i reira ua pohe roa oia i

te 3 no Mati i te matahiti 1850. I roto â oia i te Ekalesia e tae noa'tu i tona poheraa.

E homa e, ua tai'o a'enei au i te hoê parau i roto i te hoê vea i neneihia i Papeete nei e te huru ia ua hinaaro taua vea ra e vare i te mau taata Tahiti nei. Ua neneihia i roto i taua vea ra i te tahi parau ta Olive i papai i te matahiti 1846, e i te tahi atu â mau parau; e i reira ua faaite mai taua vea ra e, ua ri'ari'a o Olive i te tahi haapiiraa a te Ekalesia. Teie râ e ri'ari'a mau anei ta'na? Aita paha, no te mea e piti matahiti i muri iho ua haere mai oia ma te aau haehaa e ua titau i te oroa bapetizo ia riro faahou oia ei melo no te Ekalesia nei. E mai te au i ta'na parau ua ite oia e, tei ia matou nei te mana o te Atua, e te e'a afaro tei ia matou ia.

E hi'o tatou i te huru o Paulo i to'na hamani-ino-raa i te Ekalesia a te Mesia. Ua hape anei te Ekalesia anei, no te mea e ua patoihia e Paulo? Eiaha roa ia. E mai te mea e tai'o tatou i te pene 26 no te Evanelia a Mataio e roaa ia tatou te ite e ua huna hua o Petero i te Mesia. E ahiri ua riro taua mau parau ra to tatou ite hopea no Petero, e mea tia te mana'o e e faaroo paruparu ta'na. Na roto râ i te ohipa ta Petero i rave i muri iho i ta'na hunaraa i te Mesia e na roto i te mau parau ta'na i papai e na roto i te mau parau i papaihia e vetahi ê mau taata, ua roaa ia tatou i te ite e, e taata maitai hau ê Petero e ua tamau maite oia i te faaroo. E no reira na'u ia e haamaramarama'tu i te haerea no Olive mai to'na tomo-faahou-raa i roto i te Ekalesia e tae noa'tu i to'na poheraa.

I muri iho i te matahiti 1838 ua haere atu oia i te mataeinaa I Michigan ei reira ua rave i te ohipa no to'na toroa, e avota oia, e ua parahi oia i reira e 10 matahiti. I te avae Atopa i te matahiti 1848 ua haere atu oia e ta'na utuafare atoa i te mataeinaa Aeowa. I te reira tau ua vai te hoê

amaa o te Ekalesia i te oire Kanesville i te mataeinaa Aeowa e i te reira matahiti ua haapaohia te amuiraa Atopa i taua oire ra. Ua tairuru mai e piti tausani i te Feia Mo'a i taua amuiraa ra e na Oretoni Haede i faatere i taua amuiraa ra; ei reira atoa Olive.

I oti a'era Oretoni Haede i te a'oraa evanelia, ua tia mai i nia Olive e ua a'o mai oia. Ua faaite mai te huru o to'na haerea i te mau matahiti matamua o te Ekalesia, e i te mau mea maere rahi ta'na i ite ra, ei reira ua faaite mai to'na hinaaro mau, oia hoi ia ho'i mai i roto i te Ekalesia nei; ua na ô mai ra oia, i faaite mai to tatou taeae Haede e, "ia haere tatou na te e'a mau e tia'i, ei reira e ore roa tatou e û i te motu one." E parau mau ta'na i parau mai: tei i ô nei te Autahu'araa." Ei reira ua faaite mai oia i te huru o te faa ho'iraa mai o te Autahu'araa. Ua na ô maira oia "Ua tuu vau i to'u rima i nia i te upoo o tena na taata (mai te faatoro atu i ta'na rima ia Oretani) e ua faatoroa hia oia e au, e tei ia'na i taua autahu'araa i teie nei.

I te mau mahana matamua no Novema ua apoo te pūpū tahu'a rarahi i Kanesville, e te tumu o taua apooraa o teie ia, ia feruri i nia i te tiaraa o Olive; e i mua i taua pōpō ra ua parau mai Olive i te na ô ra e "E taima maoro i teie nei i vai taa noâ ra vau ia outou, e te hinaaro nei au i te ho'i mai: te haere mai nei au ma te aa haehaa, e aita vau i titau i te vahi teitei, tirara'tu to'u hinaaro ia riro faahou vau ei hoê no outou na. Tei rapae au i te Ekalesia e te hinaaro nei au e tomo faahou i roto na te uputa, ua ite hoi au i te uputa." Ua faatia te apooraa i to Olive hinaaro, e i na mahana i muri iho ua baptizo-faahou-hia oia e Oretoni Haede.

Ua mama'o oia e, e tauti atu oia i te tino no te Ekalesia i te vahi i mana'o hia e Iosepha te peropheta, oia hoi, i te mau peho no te Mou'a Ofai. Ua hinaaro râ oia e ta'na utua-

fare e farerei atu to ratou mau fetii o te noho i Ritimoni, Mitouri, e au te huru e piti hanere maile te area i ropu Kenesville e Ritimoni. A tere atu ai ratou ia Ritimoni ua roohia ratou e te vero hiona toetoe roa, e no reira ua tia ratou i te fare no Samuela W. Ritede (Richards), o tei parahi i taua taimera i te pae apatoerau no Mitouri. A parahi ai ratou i reira ua paraparau ratou i nia te Evanelia ma te oaoa rahi, e ua faaite atu o Olive ia Samuela e, e ineine noa oia e haere poro haere i te evanelia, mai te mea e anihia. Ua parahi o Olive ma ia Samuela ma i piti hebedoma, e i mua to'na revaraa ua papai Olive te hoë rata, oia hoi ei parau faaite raa, E mea papu e te maramarama hoi taua rata ra e no reira i iritihia'i ei re'o Tahiti e tei raro nei ia.

“A vai ai te poiri i nia i te ao nei e a vai ai te poiri taotao i nia i te mau taata ra; e i muri roa i te tau i iritihia'tu i te mana o te Atua, ia raverave i te mau oroa mo'a; na te Fatu i iriti mai i te ra'i e i tonono mai i to'na parau e faaora ia Isaraela. Ia faatupuhia i te mau Papairaa Mo'a, ua faaite hia mai te Evanelia muri ore, e te melahi mana rahi o Moroni, o tei ahuhia i te mana e afai mai i te Evanelia, e o tei faahanahana'tu i te Atua teitei ra. “O te ofai tei ootihia mai no roto mai i te mou'a ma te rima ore” o te Evanelia ia. O Ioane Bapetizo o tei mau i te mau taviri o te Autah'uraa a Aarona; e o Petero e o Iakobo, e o Ioane o tei mau i te mau taviri no te Autah'uraa a Melehizedeka, i rarave na ratou i te ohipa no te feia e farii i te ora mure ore, e i teie nei ohipa ta ratou i rave na ua faatoroa ratou i te tahi mau taata i te Autahu'araa ta ratou i mau ra. I vai na i teie nei i roto i te Ekalesia a Iesu Mesia i te Feia Mo'a i te Mau Mahana Nei i teie nei tau Autahu'araa e te mana no reira mai, e ia vai â te reira e tia'i. E ao to te taata tei farii i te Autahu'araa e e taipitihia te haamaitairaa na'na tei mau maite i te reira e tae noa'tu i te hopea ra.

A farii mai oe, e to taeae her, e no te pure haavare ore

no'na tei farii raua Iosepha te Hi'o, i te mau haamaitairaa i parau-hia i nia nei, e o tei tiaturi papu e farerei taua i roto i te hanahana Tiretira."

OLIVE TAUDERE.

Papaihia i Samuela W. Ritede.

I te 13 no Febuare 1848.

TE MAU PARAU API


I te 1 no Mati.

Te opua nei te Baretane e te Farani e opani te mau pahi no te mau hau i te tere atu i te fenua Purutia ma te hopoi atu i te maa e te arahu e te mori arahu e te capa e te vea e te reira mau huru mea tei tauturu ia Purutia ma i te tama'iraa. Aita te mau hau i fatata ia Purutia e mauruuru ia opanihia to ratou mau pahi eiaha e tere atu ia Purutia ia hinaaro ratou.

Ua vî te tahi mau pare o te Turekia e ua hutihia te reva Farani i nia iho ia ratou.

Ua hamata te Farani te pupuhi atu i te tahi mau ofai rarahi e ia harururu taua mau ofai ra e haapararehia te hoê mata'i e au hoi i te mahu (gaz) e na te reira e tupohe i te nemi e fatata mai .

Ua faatiahia i teie nei tii ei faahaamana'oraa i te mau manu i faaora i te mau faaapû o te Feia Mo'a i te matahiti 1849.



Pari, i te 2 no Mati.

E mea puai roa te aroraaa i te paeau Champagne i Farani e na te parau apî no Pari mai i faaite e ua mamu ia te Farani e te Baratani i te turai i muri te enemî.

I teie nei mau mahana te tamata nei te mau pahi o te Farani e te Paretane e tomo na roto i te Dardanelles ia tae atu ai i te oîre rahi i Turekia oia hoi c Constantinople ia haavîhia te reira. Te Dardanelles o te hoê ia miti oaoa e te roroa i rotopu i Turekia i Europa e i Turekia i Asia e o te uputa ia e tae atu ai i te Miti Ereere e te miti Marmora. Te vai ra e ravarahi te mau pare o te Turekia i te tahi pae e i te tahi pae o te Dardanelles e ua î taua miti ra i te mau topito. No reira e ere i te ohipa ohie i te enemî no Turekia e tomo na taua miti ra. Te tahi o te te mau pare i vî iananahi e i hutihia te reva Farani i nia iho o te mau pari ia i uta i te Dardanelles. Tera mai te io'a o te mau pahi o tei tamata i te haavî i taua mau pare Turekia e i tae atu i Constantinople na te Dardanelles; o Suffren e o Bouvet na pahi manuâ Farani e o Vengeanse e o Cornwallis e o Triumph na pahi manuâ iti o te Baretane.

—o—

I te 5 no Mati.

Ua faatomohia e piti pahi hopu Purutia, na te tahi na manuâ o te Baretane i faatomo. Ua faatomo-atoa-hia te tahi pahi hopu Purutia na te tahi pahi Farani i faatomo. E rave rahi te pahi i faatomohia i teie nei mau Mahana. I te 18 no Febuare ua û te hoê pahi Norwegian i te hoê topito i vai tutauchia i te miti e ua tomo roa, pohe roa'tura te mau taata i nia iho ia'na. I te 19 no Febrare tomo faahau te tahi pahi Norwegianana, aita te hoê i pahe. I taua mahana ra i faatomohia te tahi pahi Farani aita e taata i pohe. I te mau mahana hopea no Febuare ua faatomohia e 10 pahi Baretane e e piti pahi no Amarika.

Ua û taua na pahi Amarika i nia i te tahi na topito i vai tutauchia i roto i te miti.

—o—

I te 9 no Mati.

Ua vî te pae aui e te pae atau o te nuu rahi Purutia i Poland e ua horo roa i muri te pae atau i fatata i te otia o te fenua.

—o—

Te faea rii nei te aroraa i te paeau Champagne i Farane. No te hiona i faea atoa nei te tama'i i Vosges e i te paeau tooa ò te ra i Farane.

—o—

Mai te 21 no Febuare e tae atu i te 3 no Mati i faatomohia e 15 pahi Baretane faauta taihaa; na te mau pahi hopu Purutia i faatomo ia ratou.

—o—

Te faaineine nei te hau Holland e Italia atoa mai te huru te opua nei raua e tomo i roto i te tama'i i Europa. E te huru ia te faaineine atoa nei Heleni e Rumania atoa.

Aita roa i manuia te hotuapo o te nuu Rutia i te 9 no Mati. Na te Purutia i huri ia ratou i muri e ua riro e 800 faehau Rutia ei titi i roto i te rima o te Purutia. Ua roaa atoa i te Purutia e 3000 faehau Rutia ei titi. Ua vî atoa te mau aroraa i ropu te Rutia e te Purutia i te pae toerau i Rawa e ua riro i te Purutia e 1750 titi.

—o—

I te 10 no Mati.

I te 10 no Mati nei ua faatomahia te tahi pahi rahi hopu o te Purutia o U-20 to'na io'a. Ua iteahia ona i raro rii a'e i te miti e na te hoê pahi manuâ Baretane i auau atu ia'na e ua patiahia e te pae mua o te pahi. Ua faaorahia te mau matero e tei roto ratou i te hoê fare auri i Baretane i teie nei.

I te poipoi roa ua haere mai i roto i te ava i Newport News i Amerika te hoê pahi manuâ Purutia o "Prinz Eitel Friedrich" to'na io'a. O oia te hoê o te mau pahi Purutia i toe mai o tei ori haere noa na te mau miti e o tei haapeapea i te mau pahi ta ratou i farerei. E pahi horo patete oia i te matamua e i te haamataraa o te tama'i ua faarirohi ei pahi tama'i e ua tuuhia i nia ia'na i te tahi mau pupuhi rarahi.

Ia au i te taure e faatiahia taua pahi ra i te parahi tautauhia i roto i te ava i e 24 hora ana'e ei reira ia reva'tu oia e aore râ e tapeahia e te Hau Amerika e tae noa'tu i te otiraa o te tama'i.

Ia horoahia te maa e te arahu e tia'i, e ma ite mea ua ino roa te pahi e faatiahia ia parahi te tahi tau poto ia faaapîhia te mau vahi iino. Ua parauhia te parahi i tua rii te tahi mau pahi manuâ Farane e Baretane o tei tia'i ia haere mai taua pahi i rapae mai ei reira e tupohe ratou ia'na.

— o —

I te 11 no Matî.

A paruru ai te mau pupuhi rarahi o te Farne ua riro i te hoê nuu Baretane i te hoe oîre iti o Neuve Chapelle i fatata i La Basse i te pae apatoarau i Farane. E ua roaa ia ratou e 1000 faehan Purutia ei titi e i te tahi mau pupuhi matini. E taime maoro i teie nei e aita i manuia maitai te mau nuu o te Farane e te Baretane mai tera te huru.

Toae a Maere, Faaau Parau,
Rue Dumont d'Urville, Orovini, Papeete, Tahiti.

Frank J. Fullmer, Imprimeur,
2532 Seventh East Street, Salt Lake City, Utah, U. S. A.